


Eugène Martin

**Blavet
e Gau-galin**



C.I.E.L. d'Oc

Centre International de l'Écrit en Langue d'Oc

3 Place Joffre, 13130 Berre L'Étang

<http://www.lpl.univ-aix.fr/ciel/>

Eugène Martin

**Blavet
e Gau-galin**

**Edicioun H. Jacomet
Vilo-Diéu dóu Coumtat (Vau-cluso)**

1929

DEDICÀCI

A moun ami Amal Jardin, valènt aparaire de la causo nostro, bèn couralamen porge aqueste libre.

Eugèni Martin.

*Enterin, se quaucun trovavo entrepachouso
Nosto causo, jouvènço: avans toujours! es bèu,
Coume Maiorco en flour de lucha courajouso,
Contro lou picadis de la mar envejouso
E de jamai subi l'uniforme nivèu.*

Frederi Mistral (Lis Isclo d'Or)

PREFÀCI

Lou felibre Eugèni Martin es encaro tout jouinet, mai es plen d'estrambord e, dins soun Mount-Segur tant plasènt, a coumunica de soun mau à touto uno jouinesso ardènto e i'a founda 'no escolo felibrenco, l'Escolo di Lavando, qu'a 'mbauma de soun dous parfum terradouren touto soun encountrado.

Lou jouine Martin es plen d'estrambord, acò 's un privilège de la jouinesso, mai es aussi plen de gàubi e la naturo i'a douna uno amo sensiblo e vibranto, valènt-à-dire uno amo de pouèto.

A 21 an, e i'a gaire mai d'un an d'acò, a acampa sus li ribo dóu Lauzoun un flame bouquet de Vióuleto que, flour temido, poulideto e menudo, marcavon soun amour perfound pèr soun vilage, pèr si vièii pèiro, pèr soun clouquié, pèr soun castèu en rouino, pèr si pendis de genèsto, de lavando e de ferigoulo, e pèr sa ribeiroto cantadisso.

Vuei nous ligo uno nouvello garbeto: “ Blavet e gaugalin ” que margaion la meissoun verdejanto que mounto e s’amaduro soun, aqesto fes, li tëndro e delicàdi floureto de la culido: li vivo e belugànti coulour di gau-galin, la tencho plus douço di blavet lis amourtis e douno au bouquet un simboulisme pertoucant e pouëti.

Noste jouine pouëto a, certo, toujours soun entousiasme e sa fe: Tricastin e Prouvènço fan tresana lou meiour de soun amo; lis antiqui legèndo, li niue claro d’estiéu, li frèsqui matinado, la cansoun di campano, li varai de fèsto dóu païs l’esmovon e l’enaaron i pantai trelusènt, mai, ai! las, lou pouëto s’atardo vuei em’ un esmai coumpatissènt au caire di bon vièi que, davans lou fiò, remenon si souveni. Eu tambèn, lou pouëto, n’a deja, de souveni, e rèsto sounjarèu. Se devino qu’a ‘n pau mai viscu e qu’a s’oufert bessai.

L’amour de soun païs, en efet, l’amour de la bello naturo es toujours viéu en éu, mai a fa ‘no plaço, acò ‘s clar, à l’amour tout court; acò ‘s de soun age, parai? Estounavo pulèu que de cant d’amourous aguèsson pas testeja dins si proumiéri ravarié, mai eici soun: de bèus iue an boulega sis entimi pensado! e, regardas coume l’amour es bèn toujours lou meme dins si refoulèri, après li raive e l’embriagadisso, lou jouine cantaire parlo deja d’ilusioun desfuiado e devèn malancòni. Es qu’à si blavet e gau-galin se sarien entremescla dins soun galant bouquet quàuqui brout de niello que mascararien la recordo? Ah! vai, pouëto, acò ‘s pas nouvèu dins li trigos amourous e ié douno meme un pau de sabourun:

*Quau lèvo la niello dóu pan
Merito de creba de fam,*

E zóu! de voio, d’espèro e de fisanço, brave pichoun!

Basto, lou jouine Martin nous semound de charmànti floureto dins soun nouvèu libre: vous li pode pas tóuti moustra, qu’aurias plus besoun de vira lou fuiet pèr n’en fleira lou parfum; or, es justamen pèr que prenguès envejo de li vite saboura dins touto sa resplendour qu’ai escri aquèsti quàuqui ligno.

E l’ai fa ‘mé plesi, car en saludant un jovènt que felibrejo es lou Felibrige que salude dins soun aveni:

*Es panca crebado
La pèu
Dóu rampèu.*

Aubagno, 10 de Mai 1929

Dr J. Fallen

AVOUACIOUN

Vole d'un meme amour, Tricastin e Prouvènço
Vous sarra sus moun cor au mièi d'un bèu pantai...
E vous dire: — Fidèu à vautre restarai
Emai ague encamba lis an de ma jouvènço!

Dins la lucho di jour e mau-grat li varai,
Qu'enneblaran moun front en butant mi cresènço,
Quaucarèn de plus fort coume uno trelusènço
Sèmpe me gardara lou Juste e lou Verai...

Posque la voulounta di causo bono e bello
Mestreja lou coumun emai si farfantello
E me garda bèn pur l'amour de moun terrau...

E pousquessias tambèn faire dins ma memòri
Flouri ço que moun cor enclaus dins soun cibòri,
Amo de moun Païs, franco coume un mirau!

LEGÈNDO DÒU LAU DE GOURNIÉ

Près dóu Rose famous, toucant Mountelimar,
Sabe un rode autant blu qu'uno pichouno mar:
Es lou lau de Gournié! Quouro lou mistrau vènto,
Coume n'i'a de jouvènt au bras de si jouvènto
Que vènon pantaia davans soun clar mirau!..
Ciprès em' aglanié, mau-grat si plagnun rau,
Se countènton tout-just de boulega si tèsto,
E lis erso dóu lau que se liéuron batèsto
Ensèn vènon canta sus l'orle di sablas,
Mai la fin de si cant jito lou mot: Ai-las!
E li gais amoureux jagu dins l'erbo folo
S'abéuron de soulèu, e, quand lou mistrau molo
Auson dóu lau frounsi la plus bello cansoun.

I'a long-tèms, bèn long-tèms, eici, voste ourizount
Èro pa 'quéu d'un lau véuse de sa calamo,
Mai lou d'un fièr couvènt daurejant sout la flamo
Dóu soulèu matinié galoi cade matin...
Mai lou Diable crudèu que risié sout l'autin
En vesènt s'espaça li mounjo vierginello,
Se jurè de passi la gràci palinello

De toun li boutoun blanc dis iéli de soun ort.
Un vèspre que la luno avié de bèu rai d'or,
La butè de sa man i fenèstro di mounjo.
Près dóu Rose, lou Dra diguè: — Lou couvènt sounjo!
Es bèn alumina ?.. Pièi 'no vaigo rumour
Mountavo... Lou matin, de coupàblis amour
Risien e risien mai dansant la farandoulo
- Oh! la niue de bonur, li mounjo èron sadoulo!..
Nous an leissa franqui la porto dóu couvènt...
E lou Diable risié d'un rire d'espavènt.
Mai Diéu qu'avié pas vist Cifèr e si messorgo
Venguè trouba lou Dra: - Vas me baia 'no sorgo
De toun flume gigant, sout terro passara
E segound mi desi ! - Se vos !diguè lou Dra.

E coume lou matin metié sa novo raubo
E que lou fièr soulèu couchavo la primo aubo,
La terro trantraïè, trounè, coume un veissèu
Luchant emé la mar, lou couvènt, dins lou cèu,
Jitè soun darrié plang au mièi de la chavano
E lou clouquié plourè d'uno preguiero vano...
Pièi un vènt esperdu 'm' uno longo rumour
E lou lau de Gournié cantè dins la brumour!

Mai, d'aise! se l'estiéu, vous trufant di pescaire
Voulias ana nada dins lou flot blu, pecaire!
Jamai vous envendrias sus li ribas flouri...
E lis erso jougant de rai acoulouri
Vous pivelarien lèu de soun traite mirage,
Pièi, au mitan dóu lau i'a de marrit parage
E li que lis an vist n'en soun plus revengu!
Car la Dra guèiro e dis: - Pagas voste degu!
Fau de noumbrous esclau dins mi palais de maubre!

Mai li niue de Nouvè, quouro darrié lis aubre
La luno clarinello escalo au fiermamen,
Que fara ges de vènt, ausirés douçamen
Mouna dóu lau famous, à miejo niue picanto,
L'armounious trignoun de l'ouro pertoucanto...

Amourous! pantaïant sout li fièrs aglanié
Vaqui la fin dóu cant dis erso de Gournié!

I RAMADO DÓU LEZ

Oh ! ramado dóu Lez, ame vosto armounio
Dins lou plang de la biso e lou plourun dóu vènt;
Ame li long draïou ounte vène souvènt
Bousca l'ilusioun d'uno douço alegrìo.

Car, ramado dóu Lez, sias mai que ma patrio,
Bèn mai que moun Lauzoun dóu bèu rire mouvènt;

Avès un doun sacra qu'es plen de meloudiò
Pèr cassa de moun cor lou vòu dis espavènt!

Qunte bonur seren, quanto joio requisto
De béure lou perfum d uno flour que l'a visto
E d'adoura li causo ounte a pausa sis iue!

Oh! ramado dóu Lez de joio esbalauvido
Es vâutri que fasès ma jouvènço ravidò
Quand lou bèu tèms pantaio i poutoun de la niue!

PLUEIO DE PRINTÈMS

Plòu, plòu, escouto!
Un long fremin passo dins li canié;
Coume un pale brusi de cansoun routo
Plen de malancounié!

Plòu, plòu, la terro
Mouisso de plour dins un sourne resson
E coume un brut de troupelado fèro,
Sèmblo que ié respond.

Plòu, plòu, li branco
An de festoun, poulit, esbrihaudant;
Milo raïoun au mièi de treno blanco
Blueijon tremoulant!

Plòu, plòu, li fueio
Dis óulivié dóu brancage ramu,
Sout li degout tresanon de la plueio;
Aro, tout cant es mut!

Plòu, plòu, li nivo
Soun estoumpa dins un meme mantèu;
La terro dor e la verdour s'abrivo
Car tout renais plus bèu!

Plòu, plòu, encaro,
Sus lou printèms, dins li flour d'amelié;
L'ivèr, bèn liuen, vèn d'escoundre sa caro,
Plouro dins sa foulié!

NIUE

Dins un gaudre perfound i rebat de la luno
La niue sereno vai expandi soun mantèu;
E si fiò de cristau tout mescla d'or nouvèu
Beluguejon amount e lou jour s'empaluno.

Uno miejo clarour, subre la terro bruno
Jogo, passo sèns fin e pendoulo dóu cèu;
A l'ourizount fernis un velet rouginèu
E la bello niue ris dins lou sèr que s'engruno...

Dins lou toumple vivènt de mistèri eternau
Passo lou vòu sacra d'uno estello courriolo:
A l'ourizount enca, fuson quàuquis uiau...

La niue pleno d'estiéu trapejo li draiolo,
E sente soun alen que frustelo moun cor
Enaurant mis amour en d'ufanous acord!

ATÈNTO

Tout un vèspre ai bousca dins li draïdu maien
La traço de ti pas mercado sus l'areno;
E mis iue an cerca pertout se te vesien:
En liò, pecaire! ai vist rire ta caro leno...

Dins lis aubre ount lou jour en fiéu d'argènt s'abeno,
Plen d'espèr serious dins un vèspre estiven,
T'ai pas visto passa 'mé toun bèu front seren:
Lis ouro dóu pounènt, pamens, d'amour soun pleno.

Oh! digo, ounte as passa, que vuei te vese plus?
Lou sèr qu'èro tant pur a d'estràni belu,
E tout s'enmantelis d'uno pas segrenouso!

Sente passa sus iéu 'no vaigo languisoun
E l'ouro aurié pouscu, pamens, nous èstre urouso!
Ai pa 'gu lou plesi de te vèire un brisoun,

O chato de bèuta, requisto e tant courouso

SOUVENI D'ESCOLO

I' a pas de tèms enca, que nàutri, jouïni drolo
Prenian em' afecioun lou camin de l'escolo.
Car d'aquéli prim jour, ounte erian que d'enfant,
Es sèmpre emé plesi que nous li rapelan.
E quouro t'ai leissado, oh! moun escolo amado,
Sus lou moumen countènto, après t' ai regretado!
Oh ! quau me redira li causo d'àutri-fes,
Li mèntri souveni que l'on sènt toujours fres:
Li leiçoun bèn apresso ounte avias un image,
De trat subre un caièr de taco, ah! moun jouine age,
Que siés liuen deja! Pièi, tout se fai serious,
Dins aquéli moumen vous cresès malurous:
Ditado emai ditato e punicioun à faire,
Retengudo lou sèr! Douge an, oh! qunte afaire,
Pèr lou certificat i'a lou plus gros travail:
Es lou proumié soucit que davans nous se trais.

Mai coume soun bèu, vuei, li souveni d'escolo,
A quatro ouro, lou sèr, l'on courrié li draiolo
Li libre sout lou bras, lou cor toujours countènt,
Pèr bando l'on venié dóu vilage souvènt;

De-fes, em' uno amigo, alor l'on se fachavo
E dos minuto après tourna l'on se parlavo!

Oh! moun escolo bello à tu moun souveni!
Oh! mi mèstre vers vous ame de reveni
Vous dire: Gardarai la grand recouneissènço
De tout ço qu'avès fa, pèr moun umblo jouvènço.
E tout acò s'en vai sout li piado dis an...
Mai, de-longo, pousquen festa la souvenènço
De nòsti jour d'escolo, e nòsti jour d'enfant,
D'ounte lou souveni mounto tant rescaufant!

ENCANTAMEN

La luno mounto au cèu palinello e rousènto:
Milo escaumo d'argènt dins la bluio founsour
Tresanon, fisançouso en l'ange de douçour
Amaga dins l'oumbrun de la plano risènto!

- O chato! à moun coustat, siés touto fernissènto;
De qu'as? Sentes-ti pas sus la terro en coumbour
Lou rebat amoureux de la vouto lusènto?
Tout es plen de bonur dins la palo liunchour.

Escouto! lou printèms parlo bas à la terro,
Bèn proche, saren-nous; lou mounde es fòu d'espèro;
O baio-me ta man; ause pica toun cor...

Regardo! à l'Ouriènt, coume la colo es bello,
Fai luno; aperalin, regardo aquelo estello,
Mai que tóuti, belèu, vuevo de raïoun d'or:

Es l'estello d'amour vihant sus noste sort,
E que sus nautre fai la niue caressarello!

MATINADO APRÈS LA PLUEIO

Lou cèu a ploura sa negrou;
L'aubo se lèvo, enmantelido
Pèr de neblaio trefoulido;
D'un vanc n'en crèmo l'espessour.

L'azur pale e risènt se tencho
De gris, de rose e de vióulet:
I'a de vòu de ciéune mouflet
Que la mar rouginello cencho.

Li prat soun bèu, plen de velout;
Tout blanquejo; la terro es mouisso
Coume li fru de milo pouisso
A pleno man jita pertout.

IERO E LIS ISCLO D'OR

Dins lou matin lusènt estoumpa de brumour
Iero amudido vèi au founs de sa calanco,
Peralin, peralin, un ciéucle de palour
Rousseja tremoulant dins sa mantiho blanco.

La mar, semo, bruis e belasso s'endor;
Lou soulèu matinié desvèlo la bressado
D'ounte s'escapon lèu li bèllis Isclo d'Or:
Dins un mirage anti s'eigrejon li tres fado.

La rèino, un pau plus liuen, risoulejo, eilavau:
Port-Cros! vaqui Port-Cros! emé si grand pinedo,
Sa gràci majestouso e l'oumbro de si vau,
Trencant l'ourizount clar de gaio cadenedo.

La costo trelusis dins de rebat d'argènt,
Desvelant pèr endré, lausihò e micarello,
Ounte cascaion pièi quàuqui misti sourgènt
Espeli dins l'oumbrun de l'isclo encantarello.

Davalant vers la mar, li bèu clot d'alouès,
En muraio pourpalo i ribo di draiolo
Guèiron lis óulivié, li pichot vignarés,
Pendènt qu'un pescadou fugis en barqueirolo...

Port-Cros! enamoura dintre milo perfum:
Roumanin bluiejant e brouso blanquinello,
Recato un fièr castèu coume un nivo de fum,
Lou cinerari en flour de pertout l'enmantello.

Mai l'isclo dóu Levant s'estalouiro au soulèu,
E, coume un gai limbert soun esquino daurejo,
Béu l'auro de la mar e se n'en chalo lèu,
Emai sèmpre dirien que de l'oundo s'eigrejo.

Pouqueirollo! vaqui de pin e de roucas,
E de terro endrudido is ombro majestouso;
Lis arangié, paumié, davans li castelas
Estalouiron si ramo un brisounet crentouso.

Mai dins lou souleiant, o bèllis Isclo d'Or!
Voste eterne printèms, vosto eterno jouvènço
Vous rendon soubeirano e fado de Prouvènço,
Voste cèu, vòsti flour, fan barbela li cor!

Mirage esbrihaudant dis isclo de la Grèço,
Recates lou trelus d'un pichot paradis!
Li flot de l'Ouriènt soun pas tant cantadis
Quand gisclon sus li ro de la costo en pigresso!

Quant n'i'a que soun vengu souleia sis amour;
S'abéura de soulèu pèr alounga si vido,
Dins l'èime pouderos de vòsti glòri unido:
Iero! lis Isclo d'Or! embaumado de flour!

S'eisalo dins li pin de douço entre-lusido
Ounte vènon canta lis ancian troubadour;
Li dono d'àutri-fes sèmlon que mai pouldo
Dins li rebat d'antan espeli cade jour.

Un cantaire nouvèu escalo de la terro,
Souvènti-fes revèn s'apoundre au roudelet;
Sa voues acato lèu tóuti li ventoulet.

Pouderous, grandaras, soun alenado fièro
Fai tressali li brouso en de grands estrambord:
Lou troubaire sacra canto sis Isclo d`Or!

PRINTÈMS DI MORT

Ame quand lou printèms a davala sus terro
Ana piousamen ounte dormon li mort,
Dintre lis auciprès e li bouis vesti d'or
Ouane li lèio soun ramplido de flour fèro.

Dins li claus vaste e bèu, ounte dor touto espèro,
Ame de sèntre en iéu s'apasima moun cor;
Au mitan di toumbèu, ounte d'un meme acord,
Lis an meton de gris subre li lauso fièro!

Lou soulèu dardaiant dintre li cros sourris.
L'oumbro boulego pas, dins la pas seriouso;
E d'abiho, pertout, un eissame bruis!

Un aucèu canto, aqui, subre uno toumbo urouso;
Dirien l'amo di mort tournado sout l'azur
E que renais enca pèr un nouvèu bonur!

LIUEN D'ELO

Oh! s'anavo parti, liuen d'Elo,
Bèn liuen de iéu, aperalin,
De que fariéu? l'orre charpin
M'empourtarié dins sa grand velo...

Ma jouvènço dins soun amour
Lèu foutado d'un viéu cop d'alo,
Coume la vido vendrié palo,
Sarié moun sourgènt d'amarour.

Oh! s'anavo parti, la caro
Di causo à mis iue plourarié;
Li flour blanco dis amelié
Davalarien en plueio caro.

Coume un mirau de mi pantai.
Farien sus la terro alanguido
Un cros cubert d'uno flourido
Que me dirié: - Ta joio, l'ai!

Oh! s'anavo parti, dins l'aire
L'aucèu voularié plus fougous.
E veiriéu rèn, plus rèn d'urous:
Aurié fugi coume uno laire.

La sourgueto dins si cascai
Dirié, tout de long de si ribo:
- Es partido! e lis àuti pibo
Lou reDIRIEN dins sis esfrai.

E l'auro, subran pouderouso,
Ourlarié sout lou gris dóu cèu,
E la primo sout li bacèu
Abenarié sa vido urouso.

Oh! s'anavo parti, moun cor
Me menarié dins uno draio
Pleno de bouissoun; ounte en aio
Acroucariéu mi dous record!

UN JOUR

Ero un printèms. L'auro èro douço, alangourido,
E la calamo èro expandido
Sout la fâci blouso dóu cèu:
Demourave, l'amo ravidò
Di cant d'aucèu!

Lou pantai fugitiéu m'empourtè sus sis alo...
E la Bèuta, rèino inmourtalo,
Dins l'aire blu tencha de nèu,
Clinè sis anco e sis espalo
En plen soulèu!

E samènè d'un gèst, la caro riserello,
Coume uno pouso enmascarello...
La terro prenié mai de coulour
Car li gran de primo nouvello
Eron de flour!

Oh! l'inmènso flourido e treno de beloio
Dins lou trelus, l'amour, la joio
Clarour, oh! qunte esbléugimen!
Lis ort avien repres sa voio
Si sarramen...

Bouscarlo e pimarrin parlavon d'amoureto,
L'abiho d'or pèr la vióuleto
Acourdè lèu soun vióloun...
Uno roso fasié bouqueto
A 'n parpaioun.

Car la roso fuguè de l'insète amourouso;
E sèmpe lis alo sedouso
Venien castiga lou perfum
De la roso, flour bèn-ourouso...
Dins lou clarun

Dis aubo, di miejour, dins li lusour tardiero,
S'amèron bèn sènso maniero
Long-tèms dins lis ort envejous.
Mai un jour, las! à la sourniero
De tavan rous

Venguèron poutouna la Belour expandido,
E, pèr uno ouro trefoulido
La flour leissè prendre soun cor;
E sa vierginello flourido
Veguè la mort!..

Quouro lou parpaioun fidèu, di blànquis alo,
Tournè, la roso èro tant palo
E si fuioun tant plen de plour
Que sentiguè l'ouro mourtalo
De soun amour.

Triste, lou parpaioun trevè d'àutri draiolo,
Cerquè dins li plan e li colo,
Mai troubè plus de tau perfum
Que la roso, crudelo folo,
Flour d'amarun!..

Pièi arribè qu'un sèr à l'ouro di lagremo,
A l'ouro ounte lou soulèu cremo
Au liuen pèr soun darrier adiéu
L'expandido rousenco e blemo
Tournè vers Diéu.

Ansin se despuè la belour ufanouso
E la gràci tant pouderouso
De la flour rèino au mes de mai,
Coume s'en-vai la fe courouso
De tout pantai...

Dins l'inmènse bonur de la primo daurado
Lou parpaioun dins si voulado
Cerquè pèr se pausa, mai, las!
Touto joio s'èro espoussado
Pèr sis iue las!

Sounje quant i'a de roso o de bèlli jouvènto
I dous iue que fan gau, risènto
D'amour dins lou brande dis an,
E qu'uno auro frejo espavènto
Un sèr, subran...

Sounje à si desespèr quand la lus es vengudo;
I vano e fèro desperdudo
Di fièr jouvènt sis amoureux...
Iéu t'apele, fisança aludo
Dis ome urous !..

AU TEATRE D'AURENJO

Aurenjo! coume es bèu toun teatre rouman
Dins li vèspre d'estiéu, quand la pousso envoulado
Di siècle lumenous sout li pica de man
Fan s'enaura vers Diéu l'estrambord dis armado.

Quand la Grèço reviéu emé si glòri amado
Oh! coume sis eros an de fièr lendeman!..
Courouna de lausié sout li velo estelado
Si voues fan tressali d'un alen subre-uman...

De tóuti li bancau mouvedis sout la luno
Mounto de long bravò que lou cèu empaluno:
Lou triounfle de l'Art grandis dins la belour.

E sèmpre, l'on dirié, vivènto, la muraio
Is ecò dóu passat que lou pople rambaio
Coume l'auro de mar dins un valoun de flour.

SOUVENI

Lou cat que ta man douçourouso
Caressè tout lou long dóu jour...
Que souvènt, ta gauto amourouso
Frustè coume uno bello flour!..

Lou cat que près de iéu roundino,
Urous dins soun pelage blanc,
Es lou cat de nosto vesino
Que nous amè toui dous autant...

Un cop, tu, veniés de l'escolo...
Ero un bèu sèr de gai printèms
Estaquère uno courrejolo
A soun còu, e toun jouine tèms

Risié, vesènt li campaneto
Flourido en tour de còu galant...
E s'asardè, pièi, ta maneto
A li desfaire en me gueirant.

Tant urouso, qu'es pas de crèire,
Sus ta raubo, près de toun cor,
Sorro de ti grands iue risèire,
Li pausères coume un tresor!

Toun sen flouri, de ma culido
Enaurè noste bel amour...
Lou tèms s'envai, chato poulido,
Ounte es la joio d'aquéu jour?..

Siés liuen; lou catoun m'amo encaro,
Soungé que dins soun pichot cor
Mesclè nòstis amista caro:
Èime doulènt de moun mau-cor...

PÈR LA MORT D'UNO CHATOUNO

Dintre li roucas fèr, podes ploura, sourgueto!
Bouissoun, aubre gigant, o mèle subre-bèu
Encuei, avès perdu la plus bello floureto.
De la bèuta, pèr nautre, èro lou pur simbèu.

Laisso, coume de plour, fuiage de l'autouno,
Toumba ti fueio d'or em' un plagnun secrèt.
Dins ta brèssò eternalo, o tu, pauro chatouno,
Mignoto! dor en pas emé nòsti regrèt.

Oh! noun, revendras plus pantaia dins li colo,
Ausi li cant d'aucèu, culi de bèlli flour...
Vé! lou parun di pin souto lou vènt tremolo

E l'auro emporto au liuen lou brut de nòsti plour.
Lou cèu qu'èro tant blu s'es acata di nivo
E la naturo entiero es mai morto que vivo!

DINS TOUN PAÏS

Mai l'ague jamai vist me sèmblo bèn lou vèire,
Segur que me troumpariéu pas!
Mai de te dire acò, tu voles pas lou crèire,
Pamens lou sort jamai ié carrejè mi pas...

Lou vese, sènso brut, à l'ombro di platano,
Dreissa soun vièi clouquié pesant
Que fai dins li ramas uno preguiero vano,
Es umble toun païs coume un pichot enfant!..

Un riéu galoi e fres cour souto li piboulo,
E vai, samenant si cansoun.
Li terro à mièi-coutau, ount la vigno pendoulo,
S'ombrejon d'amourié fin qu'au larg ourizount.

Uno granjo es eici, une outro eilai, encaro;
Davans éli quàuqui ciprès
Drèisson si fust loungin dins l'immensita claro;
Un parèu soun gardian de l'oustau de toun brès...

Dins lou vèspre autounen, te vese, ma chatouno;
Alin, as toun front dins ta man;
Pantaies assetado i ribo d'uno androuno:
I bais de toun païs reveses toun galant!..

LA VIDO ES UN LIBRE...

La vido es un libre dubert
Qu'avèn cadun dins l'autre mounde,
Se lou vesian sarian abounde,
De ié legi de mot sòuvert.

Lou vesen pas, es nosto joio,
Car sa visto nous gastarié
Li car moumen que l'on veirié
Despuiant touto nosto voio...

Pèr cadun uno memo lèi
A mescla de pajo plus bello,
N'i'a mens, pèr iéu, n'i'a mai pèr elo,
Tambèn n'es ansin que pèr li rèi.

Mai, las! entre li dos cuberto
Li fuiet soun mau partaja:
Car n'i'a d'espés que fan sounja
I lèio founso e grand duberto...

D'autre, qu'en virant dous fuiet
Deja sias à la fin dóu libre,
Ounte l'esperit devèn libre
Pèr n'en signa lou mot darrié.

Oh! ma vido: l'Incouneigudo,
Escriéu sus li pajo dis an
Sout mis ilusioun perdudo,
La joio de mis endeman!

NIUE DE FÈSTO

Escouto! aperalin, lou varai de la fèsto
Que mounto dóu païs au bèu mitan di lum;
La musico dins l'èr s'eisalo coume un fum
E la luno curiouso, eilamoundaut s'arrèsto.

La vesprado sereno a poutouna l'oumbrun;
Chatouno! sentes pas la douçour de sa gèsto?
Un estràni moumen passo sus nòsti tèsto,
De qu'es la languisoun que fai noste amarun?

Tout es joi, tout es gai, la niue encantarello
Dins lou charivarin montant vers lis estello,
COUNGREIO lou bonur pertout à noste entour.

Oh! nautre, de-qu'avèn, ma poulido chatouno,
Pèr que toui dous, ensèn, sout la memo courouno
Sentiguen l'amarun passa sus noste amour?

O perché dous printèms, nous fas vèire l'autouno?

BALADO A L'AUTOUNO

Li fueio toumbon sus la terro,
Sian i raro di jour galant;
La naturo se desespèro
Sout li nivo au cèu barrulant...
E lou mistrau crido sa peno
Dins li piboulo e li canié,
Fasènt sa darriereco gleno;
Quasimen l'on n'en plourarié...

L'autouno ris! à la sourniero
L'on vèi l'ivèr: ié ten sa man...
Sara rèi de mesado entiero
Bèn-lèu, e tout viesti de blanc...
Mai ounte es la caro sereno
Dóu printèms dins lis amelié?..
Ounte es sa douçourouso aleno
Que fai flouri li pradarié?.. .

Li fueio courron, la carriero
Encuei, endraio sis envanc
Li passeroun sus li goutiero
Cridon li bèu jour que s'envan...

Un ome, alin, enca sameno...
Uno femo emé soun panié
Vai dins soun ort que tant s'abeno,
Culi quàuqui liéume darrié...

Mandadis

Prince! galoi, la caro fièro,
Qu'anas à Niço tout pimpant,
Veici veni la grando fièro
Ounte li paure an ges de pan!..

O MI RAIVE...

O mi raive d'amour, dins aquest jour d'autouno
Que sèmblo esperlounga lou rire dóu printèms,
O mi raive d'amour que la joio acantouno,
Liuen de voste trelus me tendrés-ti long-tèms?

Vuei, dins l'immènso pas clafido de poutouno
E sout l'esbléugimen d'aquéu tardié bèu tèms,
Sèmblo que la douçour pauso uno grandò touno
Sus l'amarun sèns noum que tourna me retèn.

E la pas d'aquest jour m'es un doulènt suplice,
Coume un perfum jitant sis estràni delice
E que vau m'endourmi dintre li tencho d'or.

E vese mi pantai coume uno voues que canto
Bèn liuen, e s'enfugis, cercant un nouvèu port.
Pentènt qu'un làngui vèn e qu'à-cha-pau s'encanto

Sout lou soulèu tant car à mi peno de cor!

UNO ROSO

La roso qu'as à toun capèu
E que portes dins li vesprado
Sèmblo toujours faire rampèu
A moun amour, à soun astrado.

Paure de iéu! perqué l'ama
Aquelo flour, quand siés faroto
E que ta gràci fai brama
Moun cor, li bèlli niue de voto?

Perqué? Quand lou cèu à-noun-plus
Vuejo soun eissame d'estello,
Siés liuen d enamoura la lus
Que ma jouvènço vèi tant bello!..

E soufre davans lou destin
Qu'emporto liuen de iéu la roso,
Emé moun fièr pantai divin
Plourant dins sa bressolo roso!..

Aquelo flour que me fai gau,
Coume l'ame près de ta caro!
Ai-las! à tu t'es bèn egau
Que ta joio me siegue amaro!..

Quand ufanouso, sus lou cor
D'un jouvènt la roso se pauso,
Dins li bal plen d'argènt e d'or,
Soufre, car la belour te lauso...

E li fuioun rouge d'amour
Coume lou sang de ti courado,
Sèmlon s'èstre douna toujours,
Testimòni de ti pensado...

Alor, moun Diéu! quanto doulour!..

TABLÈU D'AUTOUNO

L'autouno au vènt-d'aut que fernis
Fai l'óumorno di fueio rousso
E la naturo s'estrigouso
Sout li lagremo dóu cèu gris.

Tóuti lis aubre à la perdudo
Se bacellon coume de fòu;
Coume la mort, vuei, nous n'en vòu
Fai-ti bèn soun obro degudo?..

Li pibo soufron, sènso espèr,
Plegado i desi de l'autouno;
Ounte soun li milo poutouno
Mountant dins lou vióulet di sèr?..

Lou margai d'or au bord di routo
Dins li fueio qu'a mes lou vènt
S'escound enjusqu'à l'an que vèn;
L'aucelun sauto dins li mouto...

Uno branco d'agoulencié
Tresano emé si perlo roujo,
Simbèu d'uno amista feroujo
Mesclado em' un amar pensié.

Ounte soun lis ouro poulido?..
Un viéu regrèt me poun lou cor...
Soulèu, flouresoun de la vido,
Sias li soul sourgènt d'estrabort!..

UN SÈR

Un sèr, i'a bèn long-tèms, o ma pauro chatouno,
Sarrère dins ma man ta tant pichouno man
E nòsti cor parié batien sout li poutouno
Dóu printèms amoureux de nòsti jouïnis an...

Dins aquéu sèr de lus, sounjarèu de calamo,
Sout li roso jitado i raro dóu tremount
Jurerian de mescla la fe de nòstis amo...
De sèmpre nous ama sèmblo qu'avian besoun!

O lou vèspre liunchen emé nosto tendresso,
Coume èro umble e bèu, inmènse e soubeiran;
Coume erian fisançous nous pimpant de caresso
Que semblavon mourga toui li pantais uman!

Ai las! lou vèspre car dins nosto sonvenènço,
Mai demoro vivènt emé sa refflamour.
Aièr, avèn degu n'en bandi la cresènço
E ploura 'n long moumen la fin de noste amour.

Èro un vèspre bèn fa pèr li causo crudèlo,
L'autouno serious parlavo de record,
Venguerian s'assetta dins l'errour palinello,
Coume avian nòstis iue, mouisse, d'un meme acord!..

E sarrère ti man dins mi man tremoulanto,
Un meme alen febrous clinavo nòsti front:
- Fau se dessepara dins la vido vidanto!
Diguères, que ti mot avien un dur resson!..

- Fau se dessepara, que vos? acò 's la vido...
S'erian riche, mai, las! sian paure tóuti dous...
E nous faudrié trima pèr faire la culido
D'aquéu raive tant bèu que nous sarié tant dous!..

Vé! nous faudrié trempa d'uno amo voulountouso,
Sounjo! moun paure ami, que sian coume d'enfant:
Iéu, davans l'aveni me sènte tant crentouso.
Pouèto, creses-ti jamai mouri de fam?..

Sènte dóu jour passa l'ufanouso amaresso,
O moun cor! perqu'à niue te duerbes voulutous
Pèr metre dins moun sang lou làngui e la tristesso
D'aquéu moumen liunchen que demoro tant dous?

D'agué sacrifica 'mé nòstis alegrìo,
La fe dis an urous, avèn-ti 'gu resoun?..
Aurian-ti pas miés fa, toui dous, d'èstre coutrìo
E lucha sèns fali contro l'amar besoun?..

Ai-las! i'a bèn long-tèms, o ma pauro chatouno,
Pantaiavian d'amour eterne un sèr de mai...
Erian jouine e la vido un meme sèr d'autouno
A fa s'eparpaia li rai de ta courouno

Sus nòsti front clina pèr un meme varai!..

I RIBO DE L'IVÈR

La niue toumbo, moureto,
Deja, veici l'ivèr
Qu'aribo disavert,
Fai d'uno ouro uno oureto.

Met la fre dins lou vènt,
De negre dins li aubre,
Fai dis oustau, de mautre
Sout li ciprès mouvènt.

Desfuiant li piboulo
N'en fai de grand trevant
Que jiton de long plang
Coume s'èron trop soulo.

Es l'ivèr, tout fernis,
E dins l'oumbro frejasso
Ount la douçour s'ajasso
Lou vènt raubo de nis.

Sout lou cèu, la niue toumbo
E s'estènd de pertout.
Mai tout trelus s'es rout
Car l'ivèr n'es la toumbo.

DAVANS LOU FIÒ

Un long vèspre d'ivèr, davans la ramihado,
Sounjave, lis iue clin penja vers lou fougau;
Deforo, lou bisas fasié 'no orro chamado,
Lou raive di bèu jour avié perdu sa gau.

Li vièi à moun entour disien si remembranço,
L'àutri-fes lusissié coume un soulèu tremount;
Sounjave qu'es amar quand vèn la maluranço
De vèire lou bonur di jouïnis ourizount...

De vèire trelusi l'ufanouso jouvènço
Quouro l'on sènt pesa sus vautre li vièis an.
Sounjave... e li bèu vièi, lis iue plen d'innoucènço,
Sentien de long regrèt ié courre dins lou sang.

E iéu, umble jouvènt, vesiéu un jour d'autouno
Ounte tout flourissié d'uno memo coulour,
Me vesiéu amoureux i pèd d'uno chatouno,
Belant dins si grands iue si labro toute en flour

Vesiéu soun risoulet miraia sa bello amo,
Me moustra douçamen un pege lisc e fort
De platano, e me dire: - A l'oumbro de si ramo
Escriéu nòsti dous noum car auran meme sort!

Sounjave... e desempièi desfisant li tempèsto,
Ensèn nòsti dous noum sus l'aubre soun escri.
Au remèmbe d'antan pode leva ma tèsto
Car jamai noste amour, jamai poudra mourir.

E la biso d'ivèr gemis sèmpe à la porto,
Li vièi charron sèns fin en regardant lou fiò;
La belour de l'estiéu pèr de long jour es morto:
Es bon de pantaia li pèd sus li cafiò...

Soungé... li vièi soun plus davans la chaminèio;
Me vire, lou mirau respond: - Ié soun toujours!
Car tu mai siés un vièi, regardo ta ninèio!..
Siéu un vièi mi péu brun an blanqui dins un jour.

E li rai dóu fougau esbléugisson ma caro,
Li remèmbe d'antan trampellon de mon cor.
Mai dins lou fiò, de-qu'es? O gravaduro caro,
La flamado poutouno un trelusènt record.

Soungé... siéu vièi, plus rèi. Oh! quante afrous demòni,
Lou tèms vèn d'empourta lou cèu d'un blu tant pur,
An crema nòsti noum ensèn, clar testimòni
Di rai d'uno jouinesso e d'un ancian bonur.

Siéu vièi? Es pas vrai, la joio me revihò,
Siéu jouine, aperlai l'aubre es sèmpre autant dre;
Noste amour viéu toujours, vers lou fiò que bresiho
Li vièi charron, degun aprendra moun secrèt.

E pamens ai senti, dins l'amar d'aquéu soungé,
Coume li pàuri vièi 'quel estràni malan
Que porge la jouvènço is ouro de vieiounge
Dins la douço pieta de nòsti cor d'enfant!

NOUVÈ

Nouvè! Nouvè! La glòri di campano
Jito si gai trignoun dins lou cèu gris d'ivèr...
Sus lou liunchen rousen quàuqui canard sóuvert
Travesson d'un envòu li raro de la plano...

Nouvè! Nouvè! Sout li ciprès loungin
Cado granjo a tant fre 'mé sa porto barrado,
Que lou soulèu bounias rouvihant li calado
l'argènto si fenèstro au mitan dis autin.

Nouvè! Nouvè! dins la court amudido
Li galino à mouloun au caire d'un taulié
Sounjon perqué li jour soun pas tóuti parié...
La roso de Nouvè, reialo, es expandido...

Nouvè! Nouvè! Sout l'orle de l'enclaus
Uno chato culis quàuqui ràri vióuleto...
Li fueio d'aglanié viron coume d'aleto,
Quàuqui bourro de nèu se mesclon au vènt-d'aut...

Nouvè! Nouvè! vuei dins cado oustalado,
Dins la joio que fuso e sout lou car simbèu
Dóu rouge vert-bouisset e dóu gui blanquinèu,
Fai gau davans lou fiò la famiho assemblado...

Nouvè! Nouvè! li rèire e lis enfant
En manjant lou nougat emai li papihoto,
Sènton lou liame estré di calendalo voto
Ié rejougne si cor d'un amour rescaufant...

Nouvè! Nouvè! la glòri di campano
Jito si gai trignoun dins lou cèu gris d'ivèr...
Es pèr un tèms parié qu'à Betelèn, un sèr,
Diéu venguè desnousa li cadeno pagano!..

DEFÈCI D'AMOUR

Plouro, plouro, pouèto
Car lou bonur te cren;
Aura plus que segren
Toun amo trop souleto.

Plouro, car a feni
Aro dins ta jouvènço,
L'ilusioun sèns trelusènço
Qu'embeliguè toun aveni...

Plouro, plouro, li causo
Sauprien te faire gau.
O pouèto, es egau,
Pos soufri sènso pauso!

Plouro, plouro, bèn lèu
Ta galanto amourouso
Sèmpe aliunchado, urouso,
Au païs sèns soulèu,

Plouro, sara partido
Au bras d'un bèu jouvènt.
La veiras plus souvènt,
E pèr touto ta vido!

Tout me redis: - Sèns brut
Vai-t'en dins la ramado,
Escouta l'abrivado
Dóu vènt que bramo plus!

Siéu parti. Tout me parlo
D'elo, e sa vesioun
Seguis li parpaioun
E lou cant di bouscarlo.

Pertout i'a soun bonur,
Soun bonur que me grèvo
Es pertout; soun plus brèvo
Mis ouro sèns malur!

Ah! iéu ploure, chatouno,
Car dins vue jour, ai-las!
Ausirai coume un clas
L'ouro que la courouno

Nouvialo sus lou front,
Dins la glèiso risènto
Saras touto countènto:
- Plouro! tout me respond.

PAÏSAGE DE NÈU

A la perfin la terro es blanco
E la nèu toumbo sènso arrèt,
Li sebisso n'an jusqu'is anco,
Li riéu dormon dins si grand brès.

Li grès, li pradas e li draio,
D'un meme biais soun acata...
Dins l'aire gris passon de graio;
Sèmpe nèvo l'egalita...

Toui lis aubre de l'encountrado
Soun viesti coume de trevant,
E si branco despouderado
I pèd dóu cèu prègon en van!

E la nèu, coume de mouissalo,
E sènso brut, e sènso arrèst,
Toumbo, toumbo, dins la lus palo,
Cargant de flour li naut ciprès...

Ah! que soun bèu dins la calamo,
Eli tant verd cubert de blanc...
Oumage de la terro qu'amo
Au fièr Cipris, diéu di galant!..

Oh! la nèu, li milo daurèio
Que l'ivèr jito à pleno man!..
Oh! li festoun bourdant li lèio,
Coume soun bèu! Que lis aman!..

E la nèu toumbo, toumbo, toumbo...
Lou cèu es gris coume l'esfrai,
La terro es uno inmènso toumbo
E la vido n'es qu'un pantai!

LÀNGUI DI BÈU JOUR

Plouras, lis iue! saunas, li cor!..
La biso es folo dins li branco;
Lou bel estiéu, encuei, es mort,
Vesti d'azur e de flour blanco:
Plouras, lis iue! saunas, li cor!..

Oh! lou bèu tèms, coume nous manco!..
Li fueio soun tóuti d'acord
Assemblado dins li restanco
Pèr charra d'ufanous record,
Oh! lou bèu tèms, coume nous manco!..

Plouras, lis iue! saunas, li cor!..
Lou vièsti autounen s'espalanco,
L'on sènt un doulourous mau-cor
Fa de regrèt que vous escranco...
Plouras, lis iue! saunas, li cor!..

Oh! lou bèu tèms, coume nous manco!..

LOU BASTIMEN

La vido que s'envai es un grand bastimen;
E lou tèms fugitiéu ié boutant dins si vèlo
Lou meno disavert sus de ribo nouvello,
Quau saup ounte sara dins un pichot moumen?..

Aièr, la costo en flour risié talamen bello
La mar èro tant fièro au soulèu cremesin
E l'aire blu tant lisc, que lou joue marin
Pantaiavo d'amour sus l'oundo bressarello...

Encuei lou bastimen frustejo de roucas
E la mar salivant de si tràitis anello
Sout lou cèu tout rampli de taco blanquinello,
Ié dis: - Regardo à rèire! Éu ié respond: - Ai-las!

E lou bastimen vai sout lou tèms que davalò,
Mestrejo-lou, marin! Assajo, mai en van...
Crido, despoutenta... Li ribege s'envan
A l'agrat dóu destin di roubùstis espalo..

Regardo, marinié, li païs travessa,
L'auro dóu souveni de sa voues inmourtalo
Te li despintara 'm' uno afecioun egalo
Au liunchen frustejant lou bastimen pressa...

Jouvènço d'escoulan, jouvènço de lumiero,
Bel ourizount perdu que revène treva...
Quand sus mi péu, un jour, la vido aura neva,
Cantaras dins moun cor pèr buta la sourniero!..

LIS ALO

Dempièi que l'aucelun mestrejavo lou cèu
Toui lis ome envejous cridavon: - D'alo! d'alo!..
La naturo à si voues sèmpe aussè lis espalo
Gardant jalousamen lou secrèt dis aucèu...

Mai un jour que dourmié, di causo celestialo,
L'ome espalè subran un caire dóu ridèu,
E dins l'escrèto lus di terro esperitalo
Dóu bèu prougrès alu tirè lou cabedèu.

D'un envanc pouderous, la legèndo d'Icaro
Vivènto sourgiguè dins lou liunchen fumous
Pèr sousta l'aveni dins si proujèt famous.

Mai dempièi que de dòu e de vitòri caro
Sèmpe se soun tragudo à ti pèd, cade jour,
Ome, rèi dis aucèu 'mé toun cervèu majour!

PÈR LIS EROS

Quant n'i'a que soun parti pèr la grandò envoulado,
La joïo sus li labro e la valènço au cor?
Soun mai d'un vintenau qu'aro, si pàuri cors
Dormon sout li poutoun d'uno eterno brassado...

Francés, Anglés, American, voste record
Mounto de la founsour di flot, orro bressado,
Pèr sèmpe reviha, dins nautre, lou mau-cor;
La glòri is iue de Diéu bailejo uno assemblado...

O sublîmis Eros, lou liunchen vous risié,
Quouro partiguerias dins la preclaro glòri,
Vers l'oumbro d'un nouvèu e grandaras lausié.

Sus voste cros mouvènt, li ramo li mai flòri,
Ounte lou sacrifice a mes soun ideau,
Eisalaran, pèr vautre, un remèmbe inmourtau!

MOUNAYRES, SAINT-ROMAN E PETIT

Franço, Americo latino

Soun parti tóuti tres, ai-las! plen d'esperanço,
Pàuris aviatour!..
Parti pèr l'enavans dis alo de la Franço,
Mai soun pas de retour...

La tubo lis a pres, segur, dins lis autour,
Soun tumba, maluranço!..
Lis erso lis an pres dins si grand ple d'ourrou,
Pamens avien fisança...

Glòri à vous: Mounayres e Petit, Sant-Rouman!..
Enca plen de jouvènço,
Avès sacrifica la flour de vòstis an.

Mai sèmpe gardaren vosto triplo valènço
Dins nòsti souvenènço:
O bèu martir francés dóu fèr prougrès uman!

EN MEMÒRI...

L'Escolo de la Mar jito de flour au large de Marsiho

Li veissèu soun pimpa d'agradivi coulour,
Tóuti li pavaïoun floutejon dins lou vènt.
Marsiho! D'en pertout lou remèmbe vivènt
Di mort en pleno mar expandis sa doulour.

Lou signau es douna; d'uno gènto belour
Li bastimen s'envan; uno alo d'espavènt
Douço, floutejo sus lou fum blanc e lusènt
Dis erso, eilalin ouate danson li flour!..

E sus l'inmènso pas de la mar, liuen dóu port,
S'ausis coume un senglut la preguiero di mort
Que, doulènto se trais sus li flot lumenous.

Pièi lou plang di sereno estrementis lou cèu;
Nosto Damo sono dins d'estràni bacèu;
Toussant porge à Marsiho uu velet segrenous,

Paris. Lis Aviatour dóu Bourget van jita de flour en mar

Toussant! lou jour es bèu, l'autouno soubeiran.
Dins l'aire s'expandis lou souveni di mort.
Paris! Li grands aucèu van parti vers lou Nord,
Si pitre fernissènt tènnon si cor rounflant.

Soun coumoule de flour: li crisantèmo blanc,
Rouge, li cabridello e li dalia d'or
Se mesclon simbouli 'mé lou lausié di fort.
Un batedis plus viéu, e s'eilèvon subran.

Ensèn volon, fougous. Bèn lèu, veici la mar,
Peralin l'Oucean que li remèmbre amar
Destacon sus li flot uno auro de doulour.

E, sus lou blu mouvènt, amount, dóu cèu aurin,
Pèr li mort: chivalié de l'aire, ùmbli marin,
Lis aucèu fan ploura lou trelus de si flour.

VITÒRI LINGBERGH

Americo dóu Nord, Franço

La niue pantaio e ris; soun larg carage brun
Regardo s'espandi lou troupèu dis estello:
Pendènt qu'uno clarour inmènso s'enmantello:
Fai un lau mirifi dins lou cèu plen d'oumbrun.

Es lou camp dóu Bourget. De raioun de clarun
Travesson l'ourizount coume de grand jitello.
L'atènto is iue febrous crèis en sa farfantello,
Pamens l'ouro s'abeno en vòuto d'amarun.

Mai chut! Dins la founsour un rounflamen s'alando,
Li cor picon plus viéu, e, coume uno amo cando,
“ Spirit of Sant-Louis ” se pauso esbrihaudent .

L'estrambord monte: - Vivo Lingbergh! plen d'eisaço,
Sauto de l'avioun e sourris à la Franço;
Tout un pople galoi l'emporto triounflant.

COSTES E LEBRIX

Franço-Americo latino

O Franço, dins l'azur desplego toun drapèu,
Car la Sciènci tourna vèn te dire que t'amo.
Regardo, aperialin, mounta de jo de flamo
Sus toun Arc Triounflant... regardo coume es bèu...

La vitòri luis sus la pas di toumbèu...
L'Oucean es vincu, mau-grat sa voues que bramo.
Costes, Lebrix, Franço! te fan doun d'uno ramo
De glòri. Mai ausis: de pertout fan rampèu

Pèr metre sus toun front un nouvèu diadèmo,
Diadèmo d'amour flouri de crisantèmo:
La niue s'es enfugido e veici lou matin...

L'Aucèu dóu souveni, travessant l'Atlantico,
Vèn de faire expandi sus li dos Americo
Lou ferverous poutoun di bèu pople latin!

UN PANTAI

La Franço, lis iue clin. pantaio dins sa glòri...
Blériot s'es envoula sus soun fougous aucèu,
A franqui lou proumié la Mancho dins lou cèu,
Dempieù la mar vincudo ourlo sus sa vitòri...

E la Franço sourris: lou cous de sa memòri
Sus l'alo dóu pantai fugis coume un veissèu...
Alin, sus l'Oucean verdejon lis arcèu
De ramo de lausié, car lou presènt fai flòri.

Lis erso d'Atlantico ourlon à la perfin
Sus lou cros dis Eros; de group de serafin
Canton: - Aleluia, 'mé lis Ouceanido.

E la Franço, toujours, coursejo soun pantai:
L'aveni clarinèu trelimo dins li rai;
De que vèi au liunchen? Sa caro es trefoulido..,

Que dins lou cèu nivous, sus li planto rimado,
La cisampo l'ivèr, boufe en frustant moun cor;
De ma liro jamai, soun aleno jalado
Roumpra li dous acord!



Tèste integrau

Còpi interdicho

Reserva pèr aquéli qu'an la licènci d'utilisacioun

C.I.E.L. d'Oc

Centre International de l'Écrit en Langue d'Oc

Sèti souciau:

3, plaço Joffre - 13130 Berro.

Tóuti dre reserva - Tous droits réservés - All right reserved.

© **Centre International de l'Écrit en Langue d'Oc - 1999**

© Adoubamen dóu tèste : CIEL d'Oc

Courreicioun, meso en pajo e maqueto :

Tricìo Dupuy

en sa qualita de mèmbe dóu Counsèu d'Amenistracioun dóu CIEL d'Oc.

